

आकाशवाणी जयपुर-अजमेर
प्रादेशिक समाचार

दिनांक 05.08.2025

समय: 18.45 बजे

व मुख्यमंत्री भजनलाल शर्मा पोषण अर भणार्ई-लिखाई रा हलका मांय आंगनबाड़ी कार्यकर्तावां रा काम ने घणो खास बतायो- राखी रे मौके महिलावां सारू रोड़वेज री बसां मांय दो दिन सारू मुफ्त सफर रा सुबीता रो ऐलाण कीनो।

व प्रधानमंत्री नरेन्द्र मोदी अर फिलीपींस रा राष्ट्रपति फर्डिनेंड आर. मार्कोस जूनियर री मौजूदगी मांय दोन्यू देशां बीचे नौ करार माथे सही करीजी।

व राज्यपाल हरिभाऊ बागडे कह्यो -पर्यावरण ने समर्पित पिपलांत्री मॉडल गांव हर तहसील री जरूरत।

व राज्य मांय चौमासा री बिरखा मंदी पड़बा पाछे उमस रो असर।

000

मुख्यमंत्री भजनलाल शर्मा आज जयपुर मांय राखी ज्या **मुख्यमंत्री संग रक्षाबंधन** कार्यक्रम मांय प्रदेश री 1 लाख 21 हजार आंगनबाड़ी बहनां रा बैंक खाता मांय राखी रा उपहार रा तौर ऊं 501-501 रुपया भेज्या। कार्यक्रम मांय आंगनबाड़ी बहनां ने छतरियां अर मिठाई ई दीरीजी। ई मौके मुख्यमंत्री आंगनबाड़ी कार्यकर्तावां री सराहवणा करता थकां कह्यो के बच्चां, आस वाळी लुगाइयां अर किशोरियां रा पोषण अर भणार्ई-लिखाई सारू लगातार कोशिश करे है। वे कह्यो के आंगनबाड़ी केन्द्र संस्कार रा केन्द्र व्हे है।

000

जळसा मांय मुख्यमंत्री आंगनबाड़ी बहनां ने पोषण शपथ ई दिराई। वे राखी रे मौके **महिलावां सारू** रोड़वेज री बसां मांय दो दिन मुफ्त सफर रा सुबीता रो ऐलाण ई कीनो।

ई मौके उपमुख्यमंत्री दिया कुमारी कह्यो के आंगनबाड़ी कार्यकर्तावां री मेहनत ऊं समाज रा हर तबका ने फायदो मिले है। वे कह्यो के सरकार महिलावां ने मजबूत बनावण सारू लगातार काम कर रही है अर आंगनबाड़ी कार्यकर्तावां रा मानदेय मांय दो साल ऊं दस-दस फीसदी री बधोतरी करी ज्यी है।

.000

उपहार री ई पहल रो आंगनबाड़ी बहनां स्वागत करता थकां मुख्यमंत्री ने धन्यवाद दीनो अर कह्यो के इण ऊं वां रो मनोबल बध्यो है अर बेहतर काम करण री सीख मिली है।

000

प्रधानमंत्री नरेन्द्र मोदी अर फिलीपींस रा राष्ट्रपति फर्डिनेंड आर. मार्कोस जूनियर री मौजूदगी मांय आज दोन्यू देशां बीचे करार माथे सही करीजी। आं मांय कूटनीतिक भागीदारी, आपराधिक मामला, रक्षा, विज्ञान अर तकनीक समेत केई हलकां ऊं जुड़ी आपसी कानूनी सहायता संधि शामिल है। ई मौके खबरनवीसां सागे बातचीत करता थकां प्रधानमंत्री नरेन्द्र मोदी कह्यो के फिलीपींस री अगुवाई मांय भारत आसियान रिश्ता और मजबूत व्हेला। प्रधानमंत्री कह्यो के दोन्यू देशां बीचे कारोबार लगातार बध रह्यो है जो 3 अरब डॉलर ने पार कर ग्यो है।

000

ई मौके फिलीपींस रा राष्ट्रपति कह्यो के दोन्यू देशां बीचे रक्षा हलका मांय मदद बधावण बाबत् एक राय बणी है। वे भारत रा देशी रक्षा उद्योग सागे भागीदारी मांय चाल रह्या फिलीपींस रक्षा आधुनिकीकरण री तेज गति माथे संतोष जतायो।

000

पशुपालन मंत्री जोराराम कुमावत आज जयपुर मांय मोबाइल वेटनरी यूनिट अर कॉल सेंटर चलावण ऊं जुड़ी कम्पनियां रा नुमाइंदा सागे मीटिंग कीनी। वे पशुपालन सेवावां री दक्षता, साफगोई अर वां ने बेहतर तरीका ऊं लागू करण सारू ज़रूरी हुकम ई दीना। श्री कुमावत कह्यो के महकमा मांय रीता पड़्या ओहदां माथे बेगी ई भर्तियां करी जावेला।

000

राज्यपाल हरिभाऊ बागडे कह्यो है के हर तहसील मांय पिपलांत्री सरीखो मॉडल गांव व्हेवणो चाहिजे, जिण ऊं लोगां ने पर्यावरण रा प्रति प्रेम अर वां ने बचावण री सीख मिल सके। श्री बागडे आज राजसमंद जिला रा पिपलांत्री गांव मांय राख्यी ज्या पर्यावरण महोत्सव मांय शिरकत कीनी। वे कह्यो के राज्य मांय ज़मीं री कमी नी है। वे पर्यावरणविद् श्याम सुंदर पालीवाल अर गांव वाळां री भेळी कोशिशों री सराहवणा करता थकां कह्यो के वठे ज़रूरी तादाद मांय पाणी व्हेवण ऊं वठे रा लोगां रो दूजी ठोड़ां जावणो रुक ग्यो है।

000

स्वतंत्रता दिवस रा सिलसिला मांय रेल मंत्रालय देशभर रा रेलवे स्टेशनां माथे साफ-सफाई रो अभियान चलायो है। एक अगस्त चलायी ज्यो तीन महीना रो ओ अभियान दो दौर मांय पूरो कर्यो जावेला। उत्तर-पश्चिम रेलवे रा मुख्य जनसम्पर्क अधिकारी कैप्टन शशि किरण बतायो के ई दफा **स्वभाव स्वच्छता-संस्कार स्वच्छता** मुद्दा माथे न्यारा-न्यारा कार्यक्रम राख्या जा रह्या है, ज्यां रे मार्फत मुसाफिरां अर जनता मांय साफ-सफाई रा बारा मांय जाग जगायी जावेला।

000

जम्मू-कश्मीर रा पैली वाळा राज्यपाल सत्यपाल मलिक आज दोपहरां देवलोक व्हे ग्या। 79 साल रा मलिक लंबा बगत ऊं मान्दा हा। वां रो नई दिल्ली रा एक अस्पताल मांय ईलाज चाल रह्यो हो। श्री मलिक गोवा अर मेघालय रा राज्यपाल रा तौर ऊं ई काम कीनो। राष्ट्रपति द्रौपदी मुर्मू अर प्रधानमंत्री मोदी सत्यपाल मलिक रे देवलोक व्हेवण परां दुःख जतायो है। दूजी कानी झारखंड रा देवलोक व्हे पैली वाळा मुख्यमंत्री शिबु सोरेन रो आज झारखंड मांय रामगढ़ जिला रा नेमरा गांव मांय पूरा मान सागे दाग कर दियो ज्यो।

000

राज्य मांय चौमासा री बिरखा मांय कमी पाछे कठे-कठे उमस रो असर महसूस कर्यो जा रह्यो है। अलवर, दौसा, करौली, भरतपुर अर धौलपुर सारू बरसात रो येलो अलर्ट जारी करी ज्यो है। मौसम विभाग राज्य रा घणखर हलकां मांय आवता 4-5 दिन भारी बारिश नी व्हेवण रा आसार जताया है। प्रदेश रा ऊगणी हलकां मांय आवता 2-3 दिन कठे-कठे गरज सागे हल्की ऊं मझला दर्जा री बिरखा रा आसार है। 8 ऊं 12 अगस्त बीचे कठे-कठे बरसात मांय बधोतरी रा आसार हैं। ई दौरान भरतपुर, कोटा, उदयपुर, अजमेर अर जयपुर संभाग मांय कठे-कठे हल्की ऊं मझला दर्जा री बिरखा रा आसार है। ई बीचे लारला 24 घंटां मांय कठे-कठे उमस रो असर बध ग्यो। सब ऊं बत्ती 6 सेंटीमीटर बिरखा धौलपुर जिला रा सरमथुरा मांय दर्ज करीजी। ई रे अलावा कोटा, प्रतापगढ़, उदयपुर, डूंगरपुर अर बांसवाड़ा मांय हल्की बरसात रा समाचार है। बारां, करौली अर राजसमंद समेत केई ठोड़ां छांटो-छिड़को व्ह्यो।

000

एनडीए संसदीय दल री मीटिंग आज नई दिल्ली रा संसद भवन परिसर मांय राख्यी ज्यी। इण मांय प्रधानमंत्री नरेन्द्र मोदी, रक्षा मंत्री राजनाथ सिंह, गृह मंत्री अमित शाह, भाजपा रा अध्यक्ष जे. पी. नड्डा अर एनडीए रा सांसद शामिल ह्यो। मीटिंग मांय सांसद ऑपरेशन सिंदूर अर ऑपरेशन महादेव री कामयाबी सारू प्रधानमंत्री री सराहवणा कीनी। सांसद सशस्त्र बलां रा काम अर वां रा अडिग समर्पण री सराहवणा करता थकां आं री कामयाबी रा बारा मांय एक राय ऊं प्रस्ताव पास कीनो। मीटिंग मांय पहलगाम आतंकी हमला रे कारण जान गमावण वाळां ने सिरधाभाव सागे याद करी ज्यो। संसदीय कार्यमंत्री किरें रिजिजू कह्यो के एनडीए सरकार मजबूत अर शांति वाळो विकसित भारत बणावण सारू लगातार कोशिश कर रही है।

000

सूचना अर प्रसारण राज्य मंत्री डॉ. एल. मुरुगन कह्यो है के सरकार मनोरंजन अर कंटेंट क्रियेशन रा हलका ने बधावो देवण सारू केई जतन कीना है। श्री मुरुगन आज नई दिल्ली मांय राज्यां अर केन्द्र रा राज वाळा प्रदेशां रा सूचना अर जनसम्पर्क सचिवां रा राष्ट्रीय सम्मेलन रा उद्घाटन सत्र मांय बोल रह्या हा। वे कह्यो के प्रेस सेवा पोर्टल, इंडिया सिने हब, इंटरनेशनल फिल्म फेस्टिवल, वेब्स बाजार अर वेब शिखर सम्मेलन ऊं मोटा बदलाव आया है। ई मौके सूचना अर प्रसारण सचिव संजय जाजू ई राष्ट्रीय सम्मेलन ने खास मुद्दां माथे विचार अर सहयोग रो मंच बतायो।

000